

02 NOV 2002

Asean-Mahathir/I

MAHATHIR TUNGGAK DALAM MEMBINA ASEAN, KATA SEVERINO

Oleh: Muin Abdul Majid

PHNOM PENH, 2 Nov (Bernama) - Setiausaha Agung Asean Rodolfo Severino hari ini menyifatkan Datuk Seri Dr Mahathir Mohamad sebagai "tunggak" dalam perkumpulan serantau itu dan seorang pemimpin yang memiliki "ketabahan" untuk melakukan yang terbaik bagi Malaysia.

"Saya telah lama mengenali Dr Mahathir dan saya sentiasa menghormati beliau kerana beliau mempunyai idea yang jelas mengenai apa yang baik bagi negaranya dan ketabahan yang diperlukan untuk menjalankan dasar-dasar yang beliau fikir adalah baik untuk negaranya," kata Severino semasa ditemui pada mesyuarat pegawai-pegawai kanan Asean menjelang Sidang Kemuncak Asean Ke-8 yang akan bermula di sini pada Isnin.

Diplomat itu diminta memberikan pandangannya mengenai Dr Mahathir yang telah menyatakan hasrat untuk meletakkan jawatan sebagai perdana menteri selepas Sidang Kemuncak Pertubuhan Persidangan Islam (OIC) di Kuala Lumpur pada Oktober tahun depan.

Severino berkata Dr Mahathir telah mempamerkan kepimpinan yang berkualiti dan telah melakukan "tugas cemerlang" dalam menggalakkan perpaduan di kalangan penduduk berbilang kaum Malaysia.

Severino, yang berkhidmat bagi tahun terakhir sebagai setiausaha agung Asean, turut menyangkal satu soalan daripada seorang wartawan Australia bahawa Dr Mahathir sering membantah bagi peluasan Asean.

Beliau berkata Dr Mahathir adalah penggerak utama bagi peluasan Asean, termasuk dalam membawa masuk Kemboja, Laos, Myanmar dan Vietnam.

Wartawan itu kemudian mengemukakan soalan sama ada Dr Mahathir akan bersetuju dengan sidang kemuncak Asean+Australia.

Severino berkata penganjuran mesyuarat seumpama itu bukannya diputuskan oleh Asean.

Sidang Kemuncak Asean di sini akan disusuli dengan sidang kemuncak bersama Asean+3 dengan China, Jepun, Korea Selatan serta sidang kemuncak berasingan dengan setiap negara yang turut serta dan juga India.

Severino berkata mesyuarat peringkat tinggi seumpama itu merupakan satu petunjuk akan dasar Asean yang mahu bekerjasama dengan jiran-jirannya, terutamanya tiga negara Asia Timur berkenaan.

Beliau juga berkata perbincangan telah diadakan bertahun-tahun lamanya mengenai bagaimana untuk menggalakkan rangkaian perdagangan dan pelaburan Asean dengan Australia dan New Zealand.

-- BERNAMA

MAM ZMN AFY RHM